

02 MAY 2003

AGONG SERIKAN RUMAH TERBUKA TADAU KAAMATAN

KOTA KINABALU, 2 Mei (Bernama) -- Yang di-Pertuan Agong Tuanku Syed Sirajuddin Syed Putra Jamalullail dan Raja Permaisuri Agong Tuanku Fauziah Tengku Abdul Rashid dijangka menyerikan Rumah Terbuka Tadau Kaamatan (Pesta Menuai) mulai jam 5 petang di Padang Merdeka di sini pada 18 Mei.

Tetamu kenamaan lain termasuk Yang Dipertua Negeri Sabah Tun Ahmadshah Abdullah dan isteri Toh Puan Dayang Masuyah Awang Japar, Perdana Menteri Datuk Seri Dr Mahathir Mohamad dan Ketua Menteri Sabah Datuk Musa Aman.

Menurut kenyataan Pelancongan Malaysia cawangan Sabah hari ini, Rumah Terbuka Tadau Kaamatan itu dianjurkan bersama oleh Kementerian Kebudayaan, Kesenian dan Pelancongan serta kerajaan negeri Sabah sempena Pesta Menuai yang dirayakan oleh masyarakat Kadazandusun.

Seperti sambutan rumah terbuka yang lain, Rumah Terbuka Tadau Kaamatan akan dianjurkan secara meriah dan beberapa program menarik telah disusun termasuk kemunculan khas Ratu Unduk Ngadau (Pesta Menuai) 2002 dan pemenang kedua pertandingan ratu itu.

Selain persembahan tarian berwarna warni, penghibur popular Malaysia, Siti Nurhaliza dijangka mengejutkan para tetamu dengan dendangan sebuah lagu Kadazandusun berjudul "Tadau Tagazo Do Kaamatan."

-- BERNAMA

NT ROS